

**Naalagaaffiit Peqatigiit (NP) Meeqqat pillugit Isumaqatigiissutaata tamarmiusup Kalaallit Nunaanni tamarmi atuutsinneqarlernissaa anguniarlugu aammalu Meeqqat Illersuisuata inassuteqaataanut matumunnga aalajangiiffigisassatut siunnersuummut naammassinnittumik ingerlaasissamik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartuni Siumut sinnerlugu ilaasortat)

### **Akissuteqaat**

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

### **Aappassaanneerpeqarnera**

Aallarniutigalugu Ilaqutariinnermut Peqqissutsimullu Ataatsimiititaliap siunnersuut peqqissaarullugu suliarisimammassuk qutsavigerusuppakka.

Tullerriiarinitsinni meeqqat sallerpaasussat ilagimmatigit – aamma taamaattussaammat - kikkut tamarmik isumaqatigiissutigissagaat qularinngilara. Aammattaaq meeqqanik sumiginnaasarneq tamatta akuerisinnaanagu isumaqatigiissutigisinnaagippat aamma meeqqanik sumiginnaasarnerit ikilisinniarlugit suna tamaat atorlugu sulisariaqarnerput qularinngilara.

Meerartatsinnut atugassarititaasut patajaallisinniarlugit suliaqarnermi meeqqat pisinnaatitaaffii pillugit Naalagaaffiit Peqatigiit isumaqatigiissutaat pissusissamisoortumik ilaavoq. Iliuseqarnissaq meeqqattalu atugarissaarnissaat anguniagaavoq.

Tamanna iluatsitsiviussappat siunissamut ungasinnerusumut eqqarsarluta aamma inuiaqatigiinni suliaassarfiit amerlanerusut akornanni sulinissarput pisariaqarpoq. Matumani angajoqqaat angajoqqaatut pisinnaanerit pineqarpoq, perorsaasut ulluuneranilu paaqqinnittarfiit pineqarput, kommunini sulianik suliarinnittarnerup pitsaassusaa sunniutaalu pineqarput, katsorsaasarnerit meeqqanut ilaqutariinnullu tunniunneqarsinnaasut pineqarput, ilaqutariinnut inissaqartitsiniarnerit allarpasuillu pineqarput.

Naalakkersuisut sumiginnaasarnerit amerlussusaat ikilisarniarpaat taamaammallu meeqqanut suliaassarfik tullerriiarinermi sallerpaanut ilaavoq. Suliaassarfiup tullerriiarinermi salliutinneqarnera sulisussaqaarniernermut aningaasaqarnermullu aningaasaliissutini atugassanngortinneqartuni takuneqarsinnaavoq, ukiullu sisamat kingullit ingerlaneranni meeqqanut inuusuttunullu suliaassarfimmuut ataatsimoortillugit 250 mio.kr.-nit sinnerlugit immikkoortinneqarsimapput. Taamaalilluni isumaginninnermut, peqqissutsimut ilinniartitaanermullu suliaassarfiit akornanni suliniutit amerlasuut aallartinneqarsimapput tamarmillu meeqqanut inuusuttunullu suliaassarfimmi suliniutinut ikorfartuutaassapput. Suliniutinut tamanut siunissamut ungasinnerusumut ataatsimoortumillu isigininneq ataatsimoorussaavoq.

Suliutigineqartussat tamarmik aallartinneqareersut allartinneqartussallu Angajoqqaat meeqqaminnik sumiginnaasarnerit akiorniarlugu Iliuusissanut Pilersaarutip, Killiliisap, Ilaqutariinnut Politikkip, Inuuneritta III-p aamma kalaallit danskillu suleqatigiinnerisa atortussanngortinneqarnissaannut ilaapput siunissamilu pisariaqartumik aningaasaliinerullutik. Suliutigineqartut meeqqat akornanni atugarissaartitsinerulernissamut kiisalu

sumiginnaasarnerit ikilisarnissaannut iluaqutaasussaapput. Taamatuttaaq suliniutigineqartut siunissami ungasinnerusumi meeqqat atuarfimmi angusarissaarnerulernissaannut qulakkeerinnissapput kiisalu isumaginninnikkut peqqinnissaqarfimmilu aningaasartuutitik ikilitsissallutik.

Peqatigisaanik suliniutit kommuninut aamma Pitsaaliuinnermut Isumaginninnermullu Aqutsisoqarfimmut ulapititsisut matumani pineqarput. Taamaammatt suliniutit malunniullutik atuutilersinneqarnissaannut piffissamik pisariaqartinneqartumik piffissaqarnissarput nikallujaatsuunissarpullu pisariaqarpoq. Ingerlatsinerit malinnaaffiguassavagut ingerlaavartumillu paasissutissanik pissarsisassaagut, taamaalilluta ineriartornissap pisariaqartinneqartup angusineqarnissaa qulakkiissagatsigu.

Ukiuni aggersuni suliami tassani ilaareersut ataatsimoortumik tapiissutit pillugit isumaqatigiinniarnissani sammineqartassapput. Tamanna suliniutit aallartinneqareersut siunissami kommuninit suliarineqarsinnaalernissaasa qulakkeerneqarnissaanut iluaqutaataassaaq.

Taamaalilluni siunissaq ungasinnerusooq eqqarsaatigalugu oqartussaasoqarfiit assigiinngitsunik suliallit akornanni meeqqanik inuusuttunillu suliassaqarfiup patajaallisarneqarnissaa anguniarlugu annertuumik sulisoqarpoq. Suliamut tassunga isumalluaqaanga. Taamaattoq matumani - qitiusuniit kommuniniillu - annertuumik sulisoqarnissaa pisariaqartinneqarmat erseqqissaatigeqqissavara. Taamaammallu suliniutissat tamakku sunniuteqarluartumik ineriartortinneqassappata piviusunngortinneqassappatalu eqqissilluni ataqqinnittumillu sulisoqarnissaa paasineqartariaqarpoq.

Meeqqanut inuusuttunullu suliassaqarfimmi suliniutaasussat suliniutaasussanit pilersaarutaareersunit pioreersuniillu aallaaveqarnissaat taamaammatt pingaaruteqartorujussuuvoq, taamaalilluta nukissavut atorluarnerussavagut marloqiusamillu sulissanata. Meeqqat pisinnaatitaaffii pillugit Naalagaaffiit Peqatigiit isumaqatigiissutaata malinneqarnissaanut pilersaarutip suliniutinit aallartinneqareersunit aallaaveqarnissaanik aamma suleqataanissaanik ataatsimiititaliap eqqarsaatersuutaa taamaammatt isumaqatigaara.

Naggasiutigalugu ilanngukkusuppara siunnersuutip matuma - aammalumi suliniutigineqartut allat - naammassinissaannut tunngatillugu massakut COVID-19 pisoq ineriartorneralu soorunami eqqarsaatigineqartariaqartoq.

Taamatut paasinnillutik Naalakkersuisut siunnersuutip akuersissutigineqarnissaa inassutigaat.